

Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat

Efterskolit pillugit inatsisartut inatsisaanni nr. 13-imi, 5. december 2008-meersumi § 20, imm. 2
Inatsisartut inatsisaatigut nr. 17, 3. december 2012-imeersukkut allanngortinneqartoq naapertorlugu
makku aalajangersarneqarput:

Kapitali 1

Tapiissuteqariaatsit tapersiissutillu

§ 1. Ilinniartitaanermut Naalakkersuisoqarfik tapiissuteqartarpoq makkununga Danmarkimi
efterskolimiinnernut atatillugu:

- 1) Angajoqqaat akiliutaannik appaanissamut.
- 2) Atuarnerup aallartilerneranut ilinniarunnaarnermullu atasumik Kalaallit Nunaanniit utimullu atuartup angalaneranut.
- 3) Atuartup angalanerminut atasumik pisariaqartunik unnuisarnerinut.
- 4) Atuartup angalanermini pisariaqartitsineq naapertorlugu nerisaqarneranut.
- 5) Qanigisap napparsimarulunneranut toquneranulluunniit atasumik Kalaallit Nunaannut utimullu atuartup angalaneranut.
- 6) Angajoqqaatut oqartussaassuseqartut Danmarkimut utimullu angalanerannut, atuartup napparsimarulunnerani toquneraniluunniit.
- 7) Misissuiartorluni angalaneq timikkut imaluunniit tarnikkut innarluutilimmit atuartumit aamma taassuma ikiortaani, tamatumani aamma assersuutigalugu ilaqutaanit, inummit ineqarfimmi attaveqaataasumit, ingerlatsivimmit assigisaanilluunniit, takuuk § 2.
- 8) Atuartunut immikkut pisariaqartitsisunut ikorsiissutinut, takuuk § 3.

Imm. 2. Qanigisatut, takuuk imm. 1, nr. 5, paasineqassapput qatanngutit, aapparisaq, qitornat, angajoqqaat aamma aanaakkut /aataakkut. Pisuni immikkut ittuni Ilinniartitaanermut Naalakkersuisoqarfup inuit allat aamma ilaquuttatut qanigisatut isigineqarsinnaanerit aalajangersinnaavaa.

§ 2. Misissuiartorluni angalanermut, takuuk § 1, imm. 1, nr. 7, tapiisoqartarpoq, atuartup immikkut ittumik pisariaqartitsisunut efterskolip sorliup naapertuunnerpaanerani paasiniaanissamut.

Imm. 2. Misissuiartorluni angalanermut ilaassaaq ilaqutariinnut attaveqaataasinnaasunut pulaarneq, atuartup efterskolernerani suleqatigiinnissamut tunngatillugit ataatsimoorussamik ilimagisaasut qulaajarnissaat siunertaralugu.

Imm. 3. Atuartoq timikkut imaluunniit tarnikkut innarluuteqartoq tassaavoq, inunntu annertuumik innarluutilinnut ikiorsiinnermut inatsimmi atuuttumi pineqartoq.

§ 3. Atuartunut immikkut pisariaqartitsisunut, tak. § 1, imm. 1, nr. 8, ikiorsiissutitut ilaapput ingerlassat atuartup immikkut pisariaqartitaanik aallaaveqarlutik atuartup iluatsitsisumik efterskolimiinnissaanut tapertaasinnaasut. Ikiorsiissutitut suussusissaat annertussusissaallu ilinniartitaanermut Naalakkersuisoqarfimmut qinnuteqartoqareerneratigut aningaasaliiffigineqartassapput.

§ 4. Aningaasanut inatsimmi aningaasaliissutaasut iluanni ilinniartitaanermut Naalakkersuisoqarfik atuartut naalakkersuisoqarfiup aqqissugaanik angalasut Københavnimut apuunnerminni isumagineqarnissaannut, kiisalu efterskolernerup aallartinneranut atasumik ilisaritsilluni piareersaallunilu pikkorissaanernik ingerlatsinnerut aningaasartuutit matussusiisinaavoq.

§ 5. Aningaasanut inatsimmi aningaasaliissutaasut iluanni ilinniartitaanermut Naalakkersuisoqarfik makkununga akiliussigallarsinaavoq:

1) Atuartut efterskolit ammanerisa avataani ilaqutariinnit attaveqaataasunit allanilluunniit angajoqqaanit taamaaliornissamut pisinnaatinneqarsimasunit isumagineqarsinnaanngitsut inissinneqarallanneritut.

2) Taamaatinnermi akiliummut, takuuk § 16, imm. 1, taamaattoq annerpaamik 8.000 kr.nik.

Imm. 2. Imm. 1 malillugu naalakkersuisoqarfiup aningaasartuutai tamatuma kingorna atuartumut angajoqqaatut oqartussaassusilinnut akileeqqusissutikkut akiligassanngortinneqassapput.

§ 6. Ilinniartitaanermut naalakkersuisoqarfiup aningaasaliissutaasut iluanni Danmarkimi efterskolini atuartut tamarmik ilinniarnissamik ilitsersorneqarnissaannut aningaasartuutit akilissavai.

Kapitali 2

Tapiissutit annertussusaat

Efterskolimiinnerup akilernissaanut tapiissutit

§ 7. Naalakkersuisut tapiissuteqartarput Danmarkimi efterskolimiinnermut angajoqqaat akiliutissaasa appartinnissaanut. Tapiissutit akilernerneqassapput pineqartut Naalakkersuisunut qinnuteqaataat tunngavigalugu.

Imm. 2. Isertitat tunngaviusussat tassaapput angajoqqaatut oqartussaassuseqartut ataatsimut akileraarutissatut isertitaat akileraaruteqaataasussanit ilanngaatitaqanngitsut, qinnuteqarnerup nalaani qaammagini kingullerit 12-ineersut (piffissami pineqartumi isertitat), taamaattoq takuuk imm. 6-8 aamma § 32, imm. 1.

Imm. 3. Ukiumoortumik aningaasanut inatsisitigut aalajangersarneqartarput annertussusissat isertitat piffissami pineqartumi atuuttut aamma tapiissutitut akiliutaasussat.

Imm. 4. Aalajangersaasoqartassaaq isertitat tunngavigineqartussat appartinneqarnissaannik atuartuusumut qatanngutaasut 18-it inorlugit ukiulinnut efterskolerluni aallartinnermi.

Imm. 5. Aalajangersarneqarsinnaavoq isertitanut appasissunut tamakkiisumik angajoqqaat akiliutissaasa akilernerneqartarnissaat.

Imm. 6. Angajoqqaatut oqartussaassuseqartut avissimappata imaluunniit averusersimappata, isertitat tunngavigineqartussat tassaassapput meeqqamut angajoqqaajusup meeqqap najugaqarfigisaata isertitai, tapiissutissat naatsorsorneqarneranni. Tamanna aamma atuutissaq naak meeraq angajoqqaamini arlariinni piffissami naligiissumi najugaqartaraluarpuunniit.

Imm. 7. Angajoqqaatut oqartussaassuseqartoq atuartup najugaqarfigisaa inummik allamik

inooqateqarpat, inooqataasup isertitai isertitat tunngaviusussat naatsorsorneqarneranni ilanngunneqassapput tapiissutissat naatsorsorneqarneranni, inooqatigiinneq aappariinneruppat imaluunniit aappariinnermut assingusuuppat, aammalu piffissami qinnuteqarfiusumi ukioq ataaseq sinnerlugu sivilissuseqarsimappat.

Imm. 8. Atuartoq angajoqqaatut oqartussaassuseqartumik peqanngippat, isertitat 0 kr.-inik annertussuseqartinneqassapput, tapiissutissat tunngaviusussat naatsorsorneqarneranni.

Imm. 9. Angajoqqaatut oqartussaassuseqartut isertitaat piffissap tapiissuteqarfiusartup iluani malunnaatilimmik appariarpata, tamatumunnga qinnuteqarneq tunngavigalugu tapiissutissat naatsorsoqqinneqarsinnaapput. Qinnuteqaat uppersaaserneqassaaq isertitat appariarsimanerannut tunngaviusunik. Isertitat tunngavigineqartussat tamatuma kingorna naatsorsorneqassapput qaammammut isertitat piffissami pisumi atuuttut nutaat 12-imik gangerlugit. Naatsorsueqqinneq tapiissutit qaffanneqarnerannik kinguneqarpat, tapiissutinik pisartagaqartoq pisussaavoq Ilinniartitaanermut Naalakkersuisoqarfik nalunaarfigissallugu isertitat malunnaatilimmik qaffassimappata.

Angalanerup akilerneqarnissaanut, ineqarnermut aamma nerisaqarnermut tapiissutit

§ 8. Atuartup imaluunniit angajoqqaatut oqartussaassuseqartut angalanerannut aningaasartuutitut tapiissutit, takuuk § 1, imm. 1, nr. 2, 5 aamma 6, akilerneqartarput pisortat angallassissutaanni akikinnerpaami aningaasartuutitut tamarmiusunut naapertuuttumik.

Imm. 2. Angallassissut alla atorineqarpat aningaasartuutit qaffasinnerpaamik matussuserneqassapput pisortat akikinnerpaamik angallassisarneranni akiusunut naapertuuttumik. Angallaviusumi pineqartumi pisortat angallassissutaannik peqanngippat, taava akiliisoqassaaq qaffasinnerpaamik pisortanit akuerineqartunut angallassissutitut akiusut appasinnerpaat akuerisaasut naapertorlugit.

Imm. 3. Angalanermut aningaasartuutit isumaginninnermut oqartussaasunit atuuttumut akilerneqartut, inunnut annertuumik innarluutilinnut ikiorsiisarnermut malittarisassat atuuttut naapertorlugit, imaluunniit meeqqanut inuusuttuaqqanullu malittarisassat atuuttut naapertorlugit angerlarsimaffiup avataani inissitaasunut, utertillugit akilerneqassapput imm. 1 aamma 2-mi killiliussat aalajangersarneqartut iluanni.

§ 9. Misissuiartorlutik angalanernut tapiissutit, takuuk § 1, imm. 1, nr. 7, akilerneqartassapput Danmarkimut utimullu pisortanit aaqqissuussanut akikinnerpaamik angalanernut aamma pulaakkanut tamakkiisumik aningaasartuutaasunut, taamaattoq qaffasinnerpaamik katillugit 30.000 kr.-iusunik timikkut imaluunniit tarnikkut innarluutilimmut atuuttumut angalaqataanullu.

Imm. 2. Ilinniartitaanermut Naalakkersuisoqarfik aningaasaliissutissanut killiliussaasumik saneqqutsisinnaavoq, pissutsit immikkut ittut tamanna pisariaqartippassuk, tamatumani aamma najugaqarfiup sumiiffiata sumiinnera pissutigalugu angalaneq annertuumik akisunerulersimappat.

§ 10. Atuartup pisariaqartumik angalanermini unnuisariaqartarneranut aningaasartuutit, takuuk § 1, imm. 1, nr. 3, aningaasartuutitik tamakkiisunik akiliinikkut tapiiffigineqartassapput.

Imm. 2. Angalanerup allanngorneratigut atuuttumut pissutsinik tunngaveqanngitsumik pisunut, immikkut tassangaannartumik ineqartinneqarnissaq pisariaqalerpat, Ilinniartitaanermut Naalakkersuisoqarfiup ineqarfigisassaq ineqarnermilu aningaasartuutissat akuerereersimassavai inissiisoqannginnerani.

§ 11. Atuartup angalaneranut atatillugu pisariaqartumik nerisaqarnissaanut tapiissutit, takuuk § 1, imm. 1, nr. 4, tunniunneqartarput najugaqarfigisami nerinnermut allagartatut.

Imm. 2. Ineqarfigisaq nerinnermut allagartanik tigusineq ajorpat, nerisaqarnermut tapiissutit tunniunneqassapput angalareernermi aningaasartuutigisimasanut uppersaatinik tunniussisoqarpat nerinnermullu ataatsimut 100 kr.-it tapiissutaassallutik.

Imm. 3. Angalanerup ingerlanerani atuartup pisuussutiginnigisaanik allannguisoqarneratigut nerinissaq pisariaqalersimappat, nerisaqarnermut tapiissuteqartoqassaaq angalareernermi aningaasartuutigisimasanut uppersaatinik tunniussisoqareerpat, nerinnermullu ataatsimut 100 kr.-it tapiissutaassallutik.

Kapitali 3

Tapiissutisinissamut piumasaqaatit

§ 12. Tapiissutisinnaanermut makkua naammassineqarsimassapput:

- 1) Atuartooq aamma angajoqqaatut oqartussaassuseqartut efterskolimiinnerup aallartinnerani Kalaallit Nunaanni najugaqavittuussapput, Kalaallit Nunaannilu minnerpaamik ukioq ataaseq najugaqarsimassallutik efterskolimiinnerup aallartinnginnerani. Kalaallit Nunaata avataani najugaqarnertut naatsorsuutigineqanngillat, taamaallaat ilinniarnissaaq isumaginninnerluunniit pissutigalugu Kalaallit Nunaanni oqartussat peqataaffigisaannik najugaqarnerit.
- 2) Atuartooq efterskolimiinnerup aallartinnerani ukiuni 8-ni meeqqat atuarfianni atuarnermik naammassisaqarsimassaaq, imaluunniit 14-inik ukioqalereersimassalluni, 18-inilli ukioqalereersimassanani.
- 3) Atuartooq efterskolimi Danmarkimi ilinniartitaanermut ministerimit akuerisaasumi ilinniartussatut akuerineqarsimassaaq, takuuk § 13. Atuartooq angerlarsimaffiup avataani inissitaq, takuuk § 17, efterskolimi Danmarkimi oqartussaasut meeqqanik inissitanik ilinniartoqarsinnaasutut akuerisaanni ilinniarsinnaanermut neriorsorneqarsimassaaq, takuuk § 13.
- 4) Atuartooq efterskolimiinnermini angajoqqaatut oqartussaassuseqartunit toqqarneqarsimasunik ilaqutariinnik atassuteqarfeqassaaq, takuuk § 14.
- 5) Atuartooq siusinnerusukkut efterskolimiinnissamut tapiiffigineqarsimassanngilaq, taamaattoq takukkit imm. 4 aamma 5.

Imm. 2. Ilinniartitaanermut Naalakkersuisoqarfiup immikkut ittutigut imm. 1, nr. 1-imi najugaqarnissamik piumasaqaat sanioqqussinnaavaa, tamatumani aamma assersuutigalugu atuartooq aamma angajoqqaatut oqartussaassuseqartut ukiuni arlaqartuni Kalaallit Nunaanni najugaqarsimappata, imaluunniit meeraq Kalaallit Nunaanni najugaqarpat aalajangersimasumik, ukiuni arlaqartuni najugaqarsimalluni, kisiannili angajoqqaatut oqartussaassuseqartut aalajangersimasumik nunami allami najugaqarsimallutik.

Imm. 3. Ilinniartitaanermut Naalakkersuisoqarfiup immikkut ittutigut ukiuni 8-ni atuarsimanissamik piumasaqaat aamma atuartup 18-inik ukioqalersimannginnissaanik piumasaqaat sanioqqussinnaavai, takuuk imm. 1, nr. 2, tamatumunnga ilanngullugu ukiut 8-t ataallugit atuarsimaneq atuartup klassimik alluisimaneraniq peqquteqarpat, ukioqqortuallaarnerlu atuartup klassimik uteqqiisimaneraniq allamilluunniit peqquteqarluni atuarnermi kinguaattoorsimaneraniq peqquteqarpat.

Imm. 4. Ilinniartitaanermut Naalakkersuisoqarfiup immikkut ittutigut imm. 1, nr. 5imi piumasaqaat sanioqqussinnaavaa, tamatumunnga ilanngullugu atuartooq nammineq pisuussutiginnigisaminik siusinnerusukkut efterskolernerminik unitsitsiinnarsimappat, imaluunniit naalakkersuisoqarfiup nalilerpagu efterskolernerup nanginnissaa atuartup ilinniaqqinnissamut periarfissaqalernissaanut pingaaruteqarluinnartoq.

Imm. 5. Atuartunut inunnut annertuumik innarluutilinnut ikiorsiisarneq pillugu malittarisassanut ilaasunut, imm. 1, nr. 5 apeqqutaatinnagu ukiut pingasut tikillugit tapiisoqarsinnaavoq.

Imm. 6. Ilinniartitaanermut Naalakkersuisoqarfik tapiissutitut tunngatillugu atugassarititaasussanik aalajangiisinnaavoq, tamatumani aamma atuartup ilisarititsiviusumik piareersaataasumillu pikkorissarnissaanut, takuuk § 4, imaluunniit atuartoq immikkut perorsaanikkut tapersorsorneqarnissamik pisariaqartitsisoq efterskolimiinnerminut atatillugu ikorsiissutissanik pisinnaalluni, takuuk § 3.

§ 13. Efterskolimi akuerisaasumi ilinniartussatut akuerisaaneq uppersarneqassaaq tamanna pillugu efterskolip atsiukkamik allagaqarneratigut.

§ 14. Angajoqqaatut oqartussaassusillit ilaqutariinnik atassuteqarfissanik toqqaasimanerat, takuuk § 12, imm. 1, nr. 4, uppersarneqarsimassaaq angajoqqaatut oqartussaassuseqartut aamma ilaqutariit atassuteqarfiusussat akornanni immersukkamik atsiukkamik nalunaaruteqarnikkut. Ilinniartitaanermut Naalakkersuisoqarfimmiit tamatumunnga atugassanngorlugu nalunaaruteqarnissamut immersugassiaq atorineqassaaq.

§ 15. Atuartoq efterskolimi najugaqarnissap aallartinnissaanut takkutinngitsoorpat, tapiissutisarnissamut pisinnaatitaaffik atorunnaassaaq.

Imm. 2. Ilinniartitaanermut Naalakkersuisoqarfup imm. 1 sanioqqussinnaavaa, atuartup efterskolip aallartinnerani takkutinngitsoornera pissutsinik immikkut ittunik akuerineqarsinnaasunik peqquteqarsimappat, tamatumunnga ilanngullugu tamanna ilaqutariinni peruluttoqarneranik angallannermiluunniit pissutsinik peqquteqarpat.

§ 16. Efterskolimiinneq maanaannaq taamaatinneqarpat tapiissuteqartarneq ullormit taamaatiffimmiit unitsinneqassaaq. Efterskole taamaatereernerup kingorna piffissami aalajangersimasumi efterskoliiminnerup akilernerneqarnissamik piumasaqarpat (taamaatinnermi akiliut), tapiiffiqarneqarnissamik pisinnaatitaaffik piffissami tassani pigiinnarneqassaaq, taamaattorli annerpaamik sapaatip-akunnerini 4-ni.

Imm. 2. Angerlamut angalanermut aamma pisariaqartumik unnuiffissanut nerisaqarnermullu aningaasartuutinik akiliunneqarsinnaaneq taamaallaat atuutissaaq, atuartoq angerlannginnermini Kalaallit Illuutaannit efterskolimut attuumassuteqartumit aaqqissuunneqartumik oqaloqatigineqaaqarsimappat. Oqaloqatigiinnermi qularnaarneqassaaq, ajornartorsiutitut uniinnarnermut patsisaasunut aaqqiissutaasinnaasut tamarmik misilinneqarsimanissaat, tamakkununnga ilanngullugit atuartunut ataasiakkaanut ikorsiissutit, takuuk § 1, imm. 1, nr. 8. Oqaloqatigiinneq atuartup efterskoliani pissaaq, atuartup efterskolernerminik unitsiinnarniarluni nalunaaruteqarnerata kinguninnguatiqut. Oqaloqatigiinnermut peqataassapput Kalaallit Illuutaanni sulisoq, efterskolimi sulisoq, atuartoq atuartorlu 18-it inorlugit ukioqarpat angajoqqaatut oqartussaataasut imaluunniit ilaqutariit atuartumut attaveqaataasut.

Kapitali 4

Qinnuteqarnermi periaatsit

Atuartunut annertuumik innarluutilinnut, aamma atuartunut angerlarsimaffup avataani inissinneqarsimasunut immikkut ittut

§ 17. Atuartunut inunnut annertuumik innarluutilinnut ikiorsiisarneq pillugu malittarisassanut atuuttunut ilaasunut aamma atuartunut meeqqanik inuusuttunillu ikiorsiisarneq pillugu malittarisassat

atuuttut naapertorlugit angerlarsimaffimmik avataanut inissinneqarsimasunut tapiissutit aatsaat tunniunneqarsinnaapput, efterskolernissaq isumaginninnermi oqartussaasunit susassaqartunit akuerineqarsimappat.

Atuartunut immikkut perorsaanikkut ikorfartorneqarnissamik pisariaqartitsisunut immikkut ittut

§ 18. Atuartut immikkut perorsaanikkut tapersorsorneqarnissamik Danmarkimi efterskolernerminnut atatillugu pisariaqartitsisut, kiisalu atuartunut taakkununga angajoqqaatut oqartussaassuseqartut ilitersorneqarnissamik qinnuteqassapput atuartut atuarfigisaanut, efterskolimi tiguneqarnissamut atatillugu, ikiorsiissutinik pisariaqartitsineq qanoq ittuunersoq qularnaarumallugu.

Atuartunut tamanut nalinginnaasumik atuuttut

§ 19. Atuartunut § 17imi pineqanngitsunut tunngatillugu angajoqqaatut oqartussaassuseqartut namminneerlutik efterskolimut akuerisaasumut qinnuteqassapput.

Imm. 2. Atuartup efterskolimi akuerisaasumi ilinniartunngorsinnaaneraniq nalunaarut aamma ilaqtariinnit attaveqaataasartussanit uppersarsaat pigineqalerpata, Namminersorlutik Oqartussanit tapiiffigineqarnissamik qinnuteqaat ilinniartitaanermut Naalakkersuisoqarfiup immersugassiaa atorlugu immersugaq nassiunneqassaaq.

Imm. 3. Qinnuteqarnermi immersugassaq Naalakkersuisoqarfiup quppersakkami innersuussaani nassaassaavoq. Skema immersugassaq immersorneqassaaq nassiunneqarlunilu atsiorneqarsimalluni angajoqqaatut oqartussaassusilinnit aqutsisumut Naalakkersuisoqarfimmiit toqqakkamut.

Qinnuteqaammut ilanngullugit nassiunneqassapput:

- 1) Efterskolip atuartup ilinniartunngorsinnaaneraniq nalunaarutaa, takuuk § 13.
- 2) Ilaqtariinnit attaveqaataasussanit uppersarsaat akuersissut atsiugaq, takuuk § 14.
- 3) Piffissap ingerlanerani najugarisimasat uppersarsaataat (historisk bopælsattesti).
- 4) Kuisinnermut uppersarsaat imaluunniit uppersarsaat alla angajoqqaatut oqartussaassuseqartut kikkunerat pillugu.
- 5) Angajoqqaatut oqartussaassuseqartut cpr-normui, isertitat piffissamut atuuttumut paasiniarnissaannut atorneqartussat, taamaattoq takuuk § 32, imm. 2. Inooqataasup cpr-normua ilisimatitsissutigineqassaaq § 7, imm. 4 naapertorlugu qinnuteqarnermi.
- 6) Karakterinut uppersarsaat ukiut arfineq pingajuanni atuarsimanermut uppersarsaatitut, takuuk § 12, imm. 1, nr. 2.

Imm. 4. Atuartoq § 17-imi pineqartunut ilaappat, ilanngullugu nassiunneqassaaq uppersarsaat pisortatut oqartussaasunit susassaqartuniit, atuartoq angerlarsimaffiup avataanut inissinneqarsimanersoq pillugu, meeqqanut inuusuttuaqqanullu annertuumik innarluutilinnut malittarisassat atuuttut naapertorlugit.

§ 20. Ilinniartitaanermut Naalakkersuisoqarfiup atuartup Danmarkimut angalanissaa aaqqissuuttussaappagu, qinnuteqaat Naalakkersuisoqarfimmi toqqagaalluni allaffissornikkut suliamik ingerlatsisuusussamit tiguneqareersimassaaq 15. marts nallertinnagu, ukiumi efterskolernerup aallartiffisassaani.

Imm. 2. Misissuiartorluni angalanissamut tapiiffigineqarnissamik qinnuteqaat Naalakkersuisoqarfiup toqqagaani allaffissornikkut suliamik ingerlatsisuusumit tiguneqareersimassaaq kingusinnerpaamik ulloq 1. Februar, ukiup efterskolerrfusussap aallartiffissaata siuliani.

§ 21. Ilinniartitaanermut Naalakkersuisoqarfiup efterskole nalunaarfiggissavaa atuartumut tapiissutissat akuersissutigineqartut taakkualu akilerneqartarneranni periaasissat pillugit.

Imm. 2. Ilinniartitaanermut Naalakkersuisoqarfiup Danmarkimi Kalaallit Illuutaat sumiiffinni attuumassuteqarfigisaanni efterskolini ilinnialersussat pillugit ilisimatissavai.

Paasissutissiisussaatitaaneq aamma utertitsilluni akiliineq

§ 22. Angajoqqaatut oqartussaassuseqartut pisussaaffigaat atuartup efterskolernerminik unitsitsinera, ilinniartimmut allamut nuunnera paasissutissallu allat tapiissutisiuarnissamut pingaaruteqartut pillugit Ilinniartitaanermut Naalakkersuisoqarfiup nalunaarutigisarnissaat.

Imm. 2. Ilinniartitaanermut Naalakkersuisoqarfik pisinnaatitaavoq tapiiffigineqarnissamik qinnuteqaatip nalilernissaanut paasissutissat pisariaqartut tamaasa piniarnissaannut, tamatumani aamma isertitanut tunngasumik pissutsit, aammalu tapiissutisianik pisartagaqaannarnissamut pisinnaatitaanerup nalilersornissaanut. Naalakkersuisoqarfik isertitanut tunngatillugu paasissutissanik nalilersuinermini misiligitissanik misissuisinnaavoq, aamma paasissutissanik allanik, tapiiffigineqartarnermut pingaaruteqartunik, aamma tapiissutit annertussusissaannut.

§ 23. Naalakkersuisut piumasarisinnaavaat tapiissutit akilerneqarsimasut utertinneqarnissaat, imaattoqarpat:

- 1) angajoqqaatut oqartussaassuseqartut paasissutissanik eqqunngitsunik nalunaaruteqarsimappata, imaluunniit pissutsini allannguutini tapiissutisarnermut pingaaruteqartunik ilisimatitsisimangippata,
- 2) tapiissutit pisassarinagit tiguneqarsimappata,
- 3) tapiissutit aningaasaliiffigineqartumut atorneqarsimangippata,
- 4) efterskolernissaq aallartinneqarsimangippat, angalanissaq inniminnerneqarsimappat aammalu akilerneqarsimalluni, imaluunniit
- 5) atuartup efterskolimiinnera imatut sivisussuseqarsimappat efterskolerneq aallartinneqarsimanani, taamaattinnerlu naammattunik tunngavilersorneqarani.

Angalanernik aqutsineq

§ 24. Ilinniartitaanermut Naalakkersuisoqarfiup atuartumut angajoqqaatut oqartussaassuseqartut isumasiortarlugit atuartup efterskolimut angalanissaa piareersartarpaa, taamaattoq takuuk imm. 3 aamma § 26, imm. 1.

Imm. 2. Ilinniartitaanermut Naalakkersuisoqarfiup atuartut Danmarkimut tikittarnerat ataqatigiissaartarpaa.

Imm. 3. Atuartunut angerlarsimaffiup avataani inissinneqarsimasunut tunngatillugu, isumaginninnermi oqartussat suliami susasaqartut, atuartumut angajoqqaatut oqartussaassuseqartut isumasiortarlugit atuartup efterskolernissamut angalanissaa Danmarkimullu tikippat isumagineqarnissaa isumagissavaa.

§ 25. Kalaallit Illuutaata inissisimanermigut atuartup efterskolianut attuumassuteqartup angajoqqaatut oqartussaassuseqartut isumasioqatigalugit atuartup efterskolereernermini angerlamut angalanissaata piareersarnissaa isumagissavaa, taamaattoq takuuk imm. 2 aamma § 26, imm. 2.

Imm. 2. Atuartunut angerlarsimaffiup avataanut inissitanut tunngatillugu isumaginninnermi oqartussaasut pisinnaatitaaffeqartup angajoqqaatut oqartussaassuseqartut isumasiorlugit atuartup efterskolimit angerlarnissaa isumagissavaa.

§ 26. Angajoqqaatut oqartussaassuseqartut kissaateqartut namminneq atuartup efterskoliliarluni angalanissaanik aaqqissuussinissamik, tamatuminnga angalanissaq sioqqullugu piffissaagallartillugu nalunaaruteqassapput, kingusinnerpaamillu 15. marts.

Imm. 2. Angajoqqaatut oqartussaassuseqartut nammineerlutik atuartup efterskolereernermini angerlarnissaanik isumaginninniartut, Kalaallit Illuutaannik tamanna pillugu ilisimatitsissapput, kingusinnerpaamillu angerlarnissaq qaammatinik 5-inik sioqqullugu.

Angalanermut aningaasartuutinik utertitsineq

§ 27. Angajoqqaatut oqartussaasut atuartup efterskolimut efterskolimiillu angalaneranik isumaginnittut, Ilinniartitaanermut Naalakkersuisoqarfimmit billetimut akikinnerpaamut, allanngortinneqarsinnaanngitsumut sillimatitaqanngitsumullu aningaasartuutitik uppersakkat utertillugit akilertissinnaavaat, tamatumani aamma angalanermi pisariaqartumik unnuinernut aningaasartuutit. Aningaasartuutit atuartumut namminermut angerlarsimaffiup Københavnillu akornanni angalanermut, kiisalu Danmarkimi aqqummut akikinnerpaamut aningaasartuutitut naatsorsorneqassapput.

Imm. 2. Billetti akikinnerpaaq imaluunniit allanngortinneqarsinnaanngitsoq atorineqanngippat utertoortigineqarsinnaapput ullormi angalaffimmi billettip allanngortinneqarsinnaanngitsup akia angalanerulluunniit akikinnerpaap nalinga.

Imm. 3. Angajoqqaat Kalaallit Nunaanni mittarfeqarfimmut qaninnermut nammineerlutik angallassigunik aningaasartuutitik namminneq akilissavaat.

§ 28. Timmisartumut billetit suliarereernerisa kingorna allannguinnermi aningaasartuutaanerujunnartut angajoqqaatut oqartussaassuseqartunit akileneqassapput, tamanna angajoqqaatut oqartussaassuseqartut angalanermik allannguinnerannik peqquteqarpat.

Tapiissutit akileneqartarnerat

§ 29. Efterskolimiinnerup akilernissaanut tapiissutit, takuuk § 7, akileneqartarput efterskolimut pineqartumut qaammatikkaartumik. Tapiissutit annertussusiat allannguuteqarpat, takuuk § 7, imm. 9, tapiissutit allanngortitat akileneqartassapput qaammatip isertitat tunngaviusut naatsorsorneqarfiata tullianiit.

Imm. 2. Tapiissutinik akiliisarneq atorunnaassaaq efterskolerneq unitsinneqarpat, taamaattoq takuuk § 16, imm. 1.

Maalaarneq

§ 30. Tapiissutit pillugit aalajangiinerit oqartussanut allanut maalaarutigineqarsinnaanngillat.

Kapitali 5

Atuutilernergat, atorunnaarsitsinnermi aamma ikaarsaariarnermi aalajangersakkat

§ 31. Nalunaarut 1. februaari 2017 atuuttuulerpoq, ukiumiillu atuarfusumit 2017/2018-imi atuuttuulissalluni.

Imm. 2. Ilutigisaanik atorunnaarsinneqarpoq Danmarkimi efterskolimiinnermut tapiissuteqartarnek pillugu Namminersorlutik Oqartussat nalunaarutaat nr. 22, 23. december 2013-imeersoq.

§ 32. § 7 naapertorlugu ukiumi atuarfusumi 2017/2018-imi tapiissutissanik naatsorsuineri isertitat akileraaruserneqartut kingulliit ilisimaneqartut atorineqassapput.

Imm. 2. Ukiumi atuarfusumi 2017/2018-imi tapiissutininik qinnuteqarneri isertitat akileraaruserneqartut takussutissianngorlugit uppersaatitut qinnuteqaammut ilanngunneqassapput.

Namminersorlutik Oqartussat, ulloq 20. januar 2017

Doris Jakobsen

/

Lone Nukaaraq Møller

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut